

**Pakaian Unik Tarik Perhatian Perhimpunan Agung Umno 2011**  
**Bernama**  
**1 Disember, 2011**

KUALA LUMPUR, 1 Dis (Bernama) -- Kehadiran beberapa perwakilan dan pengunjung pada Perhimpunan Agung Umno 2011 dengan berpakaian tradisional dan unik mencerikan lagi suasana di Pusat Dagangan Dunia Putra di sini.

Limpahan susuk tubuh yang menyarung warna putih, merah dan merah jambu menyebabkan mereka menjadi tumpuan mata seperti Timbalan Ketua Umno Kota Marudu, Baintin Adun @ Abdul Halim yang mengenakan pakaian tradisi kaum Kimaragang.

"Pakaian ini yang dipanggil 'Pinakang' dipakai oleh pahlawan dahulu kala yang melambangkan semangat keberanian dan kececalan pahlawan mempertahankan kaum Kimaragang.

"Sebelum merdeka, pakaian ini diperbuat daripada kulit kayu Timbagan yang hanya boleh didapati di Sabah, manakala tengkolok yang dikenali sebagai 'sigar' sangat teliti pembuatannya yang mengambil masa dua bulan untuk disiapkan," katanya kepada Bernama.

Sementara itu, Sulaiman Mohd Idris, 65, yang menggayakan songkok 1Malaysia setinggi 18 sm berkata songkok tersebut adalah ciptaannya bagi menggambarkan keyakinannya terhadap gagasan 1Malaysia.

"Saya dapat songkok ini dari sebuah kedai songkok di Batu Pahat," kata Sulaiman yang juga anggota jawatankuasa Umno Batu Pahat, Johor.

Bagi Abdul Rahman Daud, 60, dari Ledang, Johor, beliau memilih memakai baju kemeja 1Malaysia sebagai tanda sokongan terhadap konsep yang diperkenalkan Presiden Umno Datuk Seri Najib Tun Razak itu.

"Saya baru pertama kali datang perhimpunan ini jadi baju ini saya beli semata-mata untuk datang perhimpunan hari ini kerana saya sangat bersemangat untuk datang," katanya yang datang bersama 40 anggota dari Ledang.\

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=631194>